



Kata Pendahuluan

Tuhan mempunyai rancangan besar bagi Malaysia. Hal yang paling baik adalah jemputan-Nya bagi anda untuk turut serta dengan-Nya. Siapapun anda, dari mana pun anda, Tuhan mahu menggunakan anda. Mahukah anda membiarkan Dia menggunakan anda?

Mungkin anda berfikir, “Aku hanya budak,” atau “Aku hanya remaja. Bagaimana pula Tuhan dapat menggunakan aku?” Sebenarnya, Maria seorang remaja, Samuel budak kecil, dan Yeremia belumpun lahir waktu dia dipilih! Tuhan sudah menggunakan ramai orang muda pada masa lalu; Dia juga boleh menggunakan anda.

Mazmur 8:3 berkata, “dinyanyikan oleh kanak-kanak dan bayi. Engkau membina kubu untuk menentang musuh-Mu, untuk membinasakan seteru dan lawan-Mu.” Nampak tak? Bahkan bayi pun boleh memuji Tuhan dan memalukan iblis. Pada hari ini, terlalu ramai anak-anak dan remaja yang menyembah benda-benda dan berhala, dan bukan Tuhan. Masanya sudah tiba untuk kita *bersungguh-sungguh* kembali kepada Tuhan.

Tuhan sedang mencari orang muda yang mahu mengikut kehendak hati-

Nya. Dia tidak mencari orang yang penting atau terkenal atau yang parasnya cantik molek. Dia sedang mencari anak-anak dan remaja seperti anda yang akan berlutut dan mendoakan Malaysia.

Negara kita memerlukan doa-doa anda. Tuhan menginginkan hati anda. Mahukah anda menjawab panggilan-Nya untuk berpuasa dan berdoa?

Jika Yesus belum menjadi sebahagian hidup anda (hal ini berlaku kepada orang Kristian dan bukan orang Kristian) dan anda sungguh-sungguh mahu Dia datang ke dalam hati anda serta mengubah anda, berdoalah mengikut kata-kata berikut. Jika anda sudah menyambut Yesus ke dalam hati anda pada masa lampau, tidak salah

untuk mengungkapkan kata-kata ini sekali lagi!

Ya Tuhan Yesus, aku sudah melakukan banyak kesalahan terhadap-Mu. Ampunilah aku dan datanglah ke dalam hidupku. Terima kasih kerana mati bagiku dan membebaskan aku daripada dosa. Aku mohon Engkau menjadi Tuhan dan Penyelamat-Ku. Ubahlah hidupku dan penuhilah aku dengan Roh-Mu. Amin.



© 2000-2004 www.arttoday.com and its suppliers



Bagaimana Berpuasa

Pastikan anda membaca beberapa halaman awal ini bersama dengan ibu atau bapa atau seorang dewasa sebelum anda mula berpuasa. Penting sekali anda mengerti apa yang anda hendak lakukan dan sebabnya anda berbuat begitu.

BERPUASA TOLAK
DOA=KELAPARAN!

Jadi, berpuasa itu apa? Bukan membuat diri anda lapar, sekiranya anda merancang untuk mengurangkan berat badan. Bukan untuk menunjuk-nunjuk bahawa anda boleh bertahan sekian lama, sehingga kawan-kawan berkata “Wah”.

Berpuasa bererti bertahan tanpa sesuatu yang penting dalam hidup untuk tempoh tertentu bagi tujuan yang khusus. Sesuatu itu bukan semestinya makanan. Kemungkinan ia merujuk kepada televisyen, hiburan, komputer, hobi, atau sesuatu benda yang anda amat gemar, seperti ais krim.

Musa berpuasa semasa Tuhan memberi dia Hukum Sepuluh di Gunung Sinai. Dalam Nehemia 9, orang Yahudi berpuasa semasa mereka mengakui dosa dan bertaubat. Di dalam kitab Ester, orang Yahudi berpuasa semasa mereka berdoa kepada Tuhan untuk menyelamatkan mereka. Yesus berpuasa selama 40 hari sebelum Dia memulakan pelayanan-Nya.

Apabila anda berpuasa, anda

menyatakan kesungguhan anda kepada Tuhan. Anda merendahkan diri di hadapan Tuhan yang suci. Anda menyetepikan “keinginan dan keperluan” sendiri dan masuk ke dalam kehendak Tuhan. Anda lebih bersungguh-sungguh dengan Tuhan dan Firman-Nya. Anda dapat mengerti hal-hal dengan lebih baik dan berdoa dengan lebih tepat.

Tetapi berpuasa hanya berkesan apabila dilakukan dengan niat dan sikap yang betul. Tuhan mesti dimuliakan, bukan diri kita sendiri. Jika berpuasa membuat kita jengkel dan marah, lebih baik kita berdamai dengan Tuhan.

Bacalah Yesaya 58.1–5 dan Matius 6.16–18 untuk melihat contoh puasa yang salah. Bacalah Ezra 8.21–23 dan Yesaya 58.6–11 untuk melihat contoh puasa yang betul. Ingatlah, Tuhan hanya menghormati puasa yang menghormati Dia.

Berdoa dan berpuasa saling berganding tangan. Kedua-duanya rakan



sekerja. Puasa menambahkan kuasa kepada doa. Doa menambahkan erti kepada puasa.

Anda boleh berpuasa dalam banyak cara. Berdoalah dan mohonlah kepada Tuhan untuk menunjukkan cara berpuasa yang harus anda ikuti.



BERPUASA MAKANAN

Puasa Penuh – Tidak digalakkan bagi anak-anak kecil. Cara ini bererti anda tidak makan makanan keras selama sekurang-kurangnya 24 jam atau lebih.

Puasa 1-masa makan – Tidak makan pada satu masa makan setiap hari, seperti makan tengah hari atau petang (tetapi anda tidak boleh makan snek untuk menggantikan makanan). Anda harus makan sarapan pagi.

Puasa Separuh – Tidak makan makanan keras pada masa makan tertentu, seperti makan tengah hari. Minum air sahaja

Puasa Daniel – Tidak makan daging atau manisan (seperti pembasuh mulut yang manis dan snek) Makan sayuran, buah-buahan, nasi atau mi sahaja. Minum jus buah-buahan.



PUASA HIBURAN

Sebilangan kita boleh bertahan tanpa makanan selagi ada TV atau sambungan Internet atau permainan komputer.


Rupanya kita lebih bergantung kepada hiburan daripada makanan! Jika anda merasa Tuhan menyuruh anda berpuasa terhadap semua hiburan, taatilah Dia. Anda akan hairan melihat betapa seronoknya anda walaupun tiada TV.

Puasa Semua Hiburan – Teruskan hidup tanpa TV, tayangan, komputer (kecuali kerja rumah), muzik (kecuali muzik ibadah penyembahan), permainan (sama ada dengan papan, kad, video, komputer, telefon bimbit, atau Internet) dan apa sahaja yang mengalihkan perhatian serta memakan masa.

Puasa Khusus – Tentu sekali anda boleh bermula dengan yang kecil, seperti tidak menonton TV selama beberapa hari. Apabila anda sudah menguasai “kelaparan TV”, bolehlah anda berpuasa terhadap hal-hal lain juga.

Puasa Hobi – Jangan lakukan sesuatu yang anda gemar sekali buat (mungkin bersukan, membaca, melukis, menari, bermain alat muzik atau hanya bercakap-cakap). Jika tidak boleh berpuasa penuh, setidak-tidaknya kurangkan masa untuk hobi anda tersebut.

Puasa Kata – Berhati-hatilah terhadap setiap kata yang anda ucapkan. Buanglah semua kata-kata yang kotor dan kasar. Biarlah kebaikan dan kelembutan keluar dari mulut anda. Tentu sekali kata-kata yang anda ungkapkan itu datangnyanya dari minda. Oleh itu, anda juga mesti mengawal apa yang masuk ke dalam kepala.





Bagaimana Menikmati 40 Hari Tersebut

Asingkan banyak masa untuk mencari Tuhan dalam doa. Inilah masa yang istimewa dalam sehari yang menjadi kepunyaan anda dan Tuhan sahaja. Lagipun, berdoa akan membantu mengurangkan perasaan lapar. Dalam masa anda bersama-sama Tuhan, anda seharusnya berdoa, membaca Alkitab (Firman), Menyembah, dan cuba melakukan apa yang anda baca, doakan, dan nyanyikan (Perbuatan).

Pasang kaset atau CD penyembahan dan ikutlah menyanyi (sememangnya tanpa gangguan). Hayatilah dengan sungguh-sungguh senikatanya, dan ambillah keputusan untuk melaksanakan apa yang anda nyanyikan.

Berdoalah dengan suara kuat sesering mungkin. Jika anda tidak dapat berdoa kuat (misalnya, anda berada di dalam kelas), cubalah bersikap seperti Yesus sekiranya Dia dalam keadaan anda. Teruslah berdoa supaya anda mencontohi Dia!

Bacalah bahagian firman Tuhan setiap hari. Renungkan apa yang anda sudah baca dan tanyalah diri sendiri, “Apakah yang aku belajar mengenai Tuhan dalam bahagian ini? Apakah yang Dia ingin aku lakukan?” Pastikan anda menulis apa yang anda pelajari di dalam “kotak” yang disebut “Ilham”.

Berusahalah untuk melaksanakan cadangan di dalam kotak TINDAKAN. Yesus berkata, kita bukannya mendengar Firman-Nya sahaja melainkan kita juga harus MELAKUKANNYA.

Sebahagiannya berbentuk perbuatan baik, yang menyatakan kasih Tuhan kepada orang lain. Sebahagian lagi berbentuk tindakan yang

mempunyai erti rohani dan membantu anda berdoa.

BAWALAH ORANG LAIN MENYERTAI ANDA

Puasa bersama Keluarga—

Doronglah keluarga anda untuk bersama-sama menerima cabaran, walaupun jenis puasa yang dilakukan berbeza-beza. Bawalah ibu bapa untuk mengasingkan satu masa tertentu

setiap hari bagi keluarga anda berdoa dan membaca Alkitab bersama-sama.

Puasa bersama Persatuan Kristian—

Anjurkan puasa di sekolah anda melalui Persekutuan Kristian atau Persatuan Kristian. Usahakan supaya berkumpul untuk beberapa minit setiap hari (jika boleh) semasa rehat, sebelum atau selepas sekolah. Jika anda mempunyai kesaksian mengenai firman Tuhan kepada anda





© 2000-2004 www.arttoday.com and its suppliers

atau pekerjaan-Nya melalui anda, kongsikanlah hal itu dengan rakan-rakan. Berkumpullah sekali seminggu untuk mendorong satu sama lain, beribadah dalam penyembahan, dan berdoa.

Puasa melalui SMS – Jika anda dan kawan-kawan mempunyai telefon bimbit, bergilir-gilirlah mengirimkan peringatan. Anda juga boleh mengirimkan Ayat Alkitab untuk

mendorong kawan-kawan.

Puasa bersama Kelompok Sel – Jika anda sering menghadiri kelompok sel bersama dengan keluarga, aturlah satu masa perkongsian dalam perkumpulan sel, agar anda dapat saling mengongsikan apa-apa ilham yang telah Tuhan berikan kepada anda. Jika boleh, carilah seorang pasangan berdoa dalam pertengahan minggu untuk mendorong satu sama lain.



HARI 1: 22 JULAI

Anda Tidak Akan Haus Lagi

Yohanes 4:7-15



SRI LANKA

Sri Lanka sebuah negara yang cantik dengan pantai yang indah dan tanaman yang subur. Tetapi ramai kanak-kanak tinggal di jalan-jalan kerana ibu bapa mereka telah terbunuh dalam peperangan. Tiada sesiapa yang menjaga mereka. Kanak-kanak lain pula harus bekerja keras, dengan masa kerja yang lama untuk mendapatkan upah yang sedikit. Berdoalah bagi gereja-gereja untuk membantu kanak-kanak ini.

Yesus memberitahu perempuan itu tentang air-Nya yang memberi kehidupan. Sesiapa sahaja yang meminumnya tidak akan pernah haus lagi.

Air yang ditimba perempuan itu umpama barang mainan yang banyak, permainan, gambar dan benda-benda yang kita inginkan. Kita ingin lebih banyak lagi.

Yesus memiliki seluruh dunia. Jika kita mengenal Yesus, dan kita tahu Dia mengasihi kita, maka kita mempunyai segala sesuatu. Dia akan memberi semua yang kita perlu jika kita memohon kepada-Nya.

BERDOALAH:

- *Mohon Tuhan menolong anda untuk mengasihi Dia.*
- *Mohon Tuhan menolong anda mengikut Dia sahaja, bukan benda lain, kegiatan atau orang lain.*
- *Mohon Tuhan mengajar anda menjadi baik hati, menolong orang lain, dan tidak mementingkan diri, yang hanya memperhatikan kepentingan diri sendiri.*

TINDAKAN:

- *Lihatlah di sekitar rumah anda dan tulislah 10 benda yang menjadi berkat Tuhan kepada keluarga anda. Gantungkan senarai itu di dalam bilik untuk mengingatkan anda bersyukur kepada Tuhan atas kasih-Nya dan berkat-Nyayang banyak.*





HARI 2: 23 JULAI

Tuhan Mendengar Doa Kita

Kisah Rasul 10:1-7 & 23-33



JEPUN

Jepun adalah salah satu pengeluar besar motokar dan peralatan elektronik. Ibu bapa dan kanak-kanak sangat risau jika tidak mendapat gred sekolah yang cemerlang. Orang muda tergila-gila dengan pakaian, telefon bimbit, muzik dan peralatan digital. Tetapi ramai di kalangan mereka tidak mengenal Tuhan. Berdoalah agar gereja-gereja di Jepun menjadi kuat dan menjangkau orang yang perlu mengenal Yesus. Berdoalah agar belia Jepun akan mempunyai peluang untuk mengenal Tuhan.

Meskipun Kornelius tidak mengenal Tuhan yang benar, dia baik hati dan sentiasa menolong orang miskin, dan dia berdoa. Tuhan mendengarkan doanya lalu mengutus Petrus untuk memberitahu dia mengenai Yesus. Kornelius dan keluarganya percaya kepada Yesus. Kemudian mereka memberitahu kawan-kawan karib dan sanak saudara mereka tentang Yesus.

BERDOALAH:

- *Agar setiap rumah tangga Kristian menjadi seperti rumah tangga Kornelius – rumah tempat kebaikan dan doa.*
- *Agar sanak saudara kita yang belum mengenal Yesus akan mengenal Dia melalui keluarga kita yang mengasihi.*

TINDAKAN:

- *Jemputlah abang, kakak, dan ibu bapa anda untuk berdoa bersama-sama bagi 40 hari doa dan puasa. Ingatlah, keluarga yang berdoa bersama-sama, tetap bersama-sama.*



© Pagemaker Stockart



HARI 3: 24 JULAI

Yesus Marah

Matius 21:12-17



VIETNAM

Gereja di Vietnam tetap berkembang walaupun ada penganiayaan dari pemerintah. Para pemimpin gereja masih muda, dan berumur di bawah 20 tahun. Mereka tidak takut dipenjarakan kerana memberitakan Tuhan. Berdoalah agar orang Kristian Vietnam akan terus percaya kepada Tuhan dan kuat walaupun orang lain mengejek mereka.

Yesus marah dengan orang yang menjadikan Rumah Tuhan sebagai pasar. Dia langsung masuk, menterbalikkan meja dan membuat burung merpati berterbangan! Dia menghalau peniaga-peniaga dengan menggunakan cemeti. Dia mengingatkan mereka bahawa Rumah Tuhan sepatutnya menjadi Rumah Doa. Tetapi mereka menggunakannya untuk mendapatkan wang!

Adakah kita berbuat begitu? Adakah kita kadang-kadang menggunakan gereja sebagai taman permainan? Adakah kita pergi ke gereja dengan tujuan mencari teman lelaki atau teman perempuan? Marilah ingat selalu untuk menjadikan Gereja kita sebagai tempat Berdoa dan Menyembah Tuhan.

BERDOALAH:

- *Agar kita menghormati dan mencintai gereja kita.*
- *Agar gereja di seluruh Malaysia menyenangkan hati Tuhan dan menunjukkan jalan untuk menemukan Dia.*

TINDAKAN:

- *Berdoalah bagi pastor, pemimpin pujian dan pengkhotbah yang akan melayani di gereja anda dalam Kebaktian Ibadah hariesok.*



© Pagemaker Stockart



HARI 4: 25 JULAI

Datanglah Makan

Lukas 19:1-10



LAOS

Laos sebuah negara miskin, dan dadah adalah perniagaan yang terbesar. Orang muda dari seluruh dunia datang ke sini untuk "percutian dadah." Masalahnya, mereka tidak dapat pulang kerana mereka ketagihan dadah dan tidak mempunyai wang cukup untuk perjalanan balik. Berdoalah agar Pemerintah Laos akan menghentikan perniagaan dadah ini dan membantu penagih dadah.

Zakheus seorang lelaki yang dibenci banyak orang. Dia memungut wang daripada bangsanya sendiri bagi pemerintah Roma. Orang menyebutnya pengkhianat dan penipu. Tetapi Yesus menyambut Zakheus. Yesus menjemput diri-Nya sendiri untuk makan di rumah Zakheus. Zakheus sangat gembira sehingga dia mengambil keputusan untuk memberikan wangnya kepada orang miskin dan membayar balik orang yang ditipunya.

Yesus menjadi kawan kepada golongan orang yang tidak begitu baik di pekannya. Kita juga boleh menjadi kawan kepada orang yang sedih, orang yang agak nakal atau yang tidak begitu baik.

BERDOALAH:

- Bagi rakan sekolah yang anda kenal, yang tiada kawan dan yang nakal di dalam kelas. Mohonlah Yesus menolong anda mencari peluang untuk menjadi kawan mereka.
- Agar anda berani memberitahu kawan-kawan mengenai Yesus.

TINDAKAN:

- Jemputlah seorang kawan untuk berkongsi snek anda semasa rehat.



© Pagemaker Stockart





HARI 5: 26 JULAI

Jangan Menangis!

Lukas 7:11-17



BHUTAN

Bhutan sebuah negara yang diliputi gunung dan bukit. Negara itu beragama Buddhist dan penduduk di sana merayakan perayaan-perayaan agama yang berwarna-warni setiap tahun. Perjalanan ke sana mahal dan hanya sedikit orang asing yang dibenarkan untuk melawat Bhutan setiap tahun. Berdoalah agar orang Kristian dibenarkan untuk pergi ke Bhutan dan memberitakan Yesus. Berdoalah bagi gereja-gereja yang tersembunyi agar mereka berkembang dan menjadi kuat walaupun dianiaya.

Ibu itu sangat sedih sehingga dia tidak dapat berhenti menangis. Suaminya sudah meninggal beberapa tahun yang lalu, dan dia hanya mempunyai seorang anak lelaki. Tetapi sekarang anaknya itu juga sudah meninggal. Ramai orang datang ke pengkebumian, tetapi mereka tidak dapat melakukan apa-apa. Yesus memberitahu ibu itu supaya tidak menangis. Yesus berkata-kata kepada pemuda yang sudah meninggal, lalu pemuda tersebut bangun dan mula bercakap. Yesus memberi dia kembali kepada ibunya.

Adakah anda sedih? Datanglah kepada Yesus untuk mendapatkan penghiburan. Adakah anda mengetahui seseorang yang bersedih? Bantulah dia untuk mengenali Yesus.

BERDOALAH:

- Bagi seseorang yang anda kenal, yang sedih dan hatinya terluka. Mohonlah kepada Tuhan untuk menghiburkan dia.

TINDAKAN:

- Apabila bapa anda kembali dari kerja, peluklah dia dan beri dia minum. Pada waktu malam, berterima kasihlah kepada ibu bapa anda dan doakanlah mereka.




© 2000-2004 www.arttoday.com and its suppliers



HARI 6: 27 JULAI

Memberi Perintah!

Matius 8:5-13



INDONESIA

Indonesia adalah yang nombor empat mempunyai penduduk paling ramai di dunia. Ada banyak pergaduhan yang berlaku di beberapa tempat di negara itu. Kadang-kadang terjadi pembunuhan antara orang Kristian dan orang Islam. Berdoalah agar pemimpin yang baik mempunyai hikmat untuk memimpin bangsa ini. Berdoalah agar anak-anak di Indonesia akan memahami erti kedamaian yang sebenar.

Pegawai tentera Roma tahu semua hal mengenai memberi perintah. Dia seorang askar dan mempunyai ramai orang di bawahnya yang mematuhi setiap perintahnya. Tetapi dia mengetahui bahawa Yesus mempunyai kuasa yang lebih besar daripadanya. Yesus mempunyai kuasa atas penyakit dan segala sesuatu di dunia. Yesus kagum dengan imannya. Oleh itu, Yesus bercakap dan hamba pegawai tentera itu sembuh dengan serta-merta.

Adakah anda mengerti darihal kuasa? Anda mungkin seorang abang, dan adik-adik mentaati anda. Tetapi anda di bawah kuasa ibu bapa dan guru serta abang atau kakak yang lebih tua. Ibu bapa dan orang dewasa berada di bawah pegawai pemerintah dan pegawai tersebut di bawah Perdana Menteri. Tetapi akhirnya, semua kita di bawah Bos Terbesar – Yesus.

BERDOALAH:

- *Agar kita menghormati dan mentaati ibu bapa, guru-guru dan orang yang lebih tua.*
- *Agar orang yang memberi perintah akan mengenal bahawa Tuhan itulah yang berkuasa.*

TINDAKAN:

- *Buatlah sekeping kad terima kasih kepada ibu bapa anda atau seseorang yang menjaga anda dengan baik.*





HARI 7: 28 JULAI

Jangan Putus Asa

Matius 15:21-28



BANGLADESH

Bangladesh ialah salah satu negara yang paling miskin di atas planet ini. Setiap tahun, banjir besar melanda kawasan luar bandar, sambil membawa tanah yang subur tetapi pada masa yang sama, membunuh orang dan binatang ternakan. Ada ramai kanak-kanak yang tidak mempunyai rumah sehingga mereka hanya tinggal di jalan raya dan kaum wanita pun kadang-kadang didera. Berdoalah agar para pemimpin Bangladesh menjadi jujur dan bijaksana. Berdoalah bagi para pekerja Kristian yang menjaga kanak-kanak dan wanita yang malang di sana.

Perempuan Kanaan itu berbangsa lain. Dia tahu bahawa dia tidak sepatutnya berbual-bual dengan seorang Yahudi. Tetapi dia memohon kepada Yesus untuk menyembuhkan anak perempuannya yang sakit. Walaupun dia dihina dan diberitahu untuk pergi, dia masih mahu Yesus menyembuhkan anaknya. Yesus terharu dengan imannya. Yesus menyembuhkan anak perempuan itu pada jam itu juga.

Apabila kita memerlukan Yesus dan tidak berhenti berdoa, Dia akan mendengarkan doa kita. Seperti Yesus, kita juga mesti menolong setiap orang walaupun mereka berbeza daripada kita.

BERDOALAH:

- Bagi orang berbangsa lain di dalam kelas anda yang memerlukan kawan.
- Bagi orang yang ada masalah membuat kerja rumah.

TINDAKAN:

- Berkenalanlah dengan seseorang daripada bangsa lain. Tanyalah mereka mengenai sejarah dan budaya keluarga dan bangsa mereka, agar anda lebih memahami dan menghargai mereka.



© Pagemaker Stockart

MINGGU 1: BERTEMU YESUS BUKIT BATU KITA



Adakah Tuhan bercakap dengan anda secara istimewa?
Ambil masa sekarang untuk menulis apa yang dikatakan-Nya:



HARI 8: 29 JULAI

Abba Bapa

Roma 8:14-17



KOREA UTARA
Kebanyakan kanak-kanak di Korea Utara masuk tidur dengan perut lapar. Oleh sebab banjir, hujan batu, dan kemarau memusnahkan tanaman, tidak pernah ada makanan yang cukup bagi semua orang. Lagipun, mereka diharuskan untuk menyembah pemimpin mereka. Ramai orang Kristian menderita kerana mereka mahu menyembah Tuhan sahaja. Berdoalah agar Bapa kita di syurga akan memberkati Korea Utara dan agar anak-anak-Nya terus mengasihi Yesus.

Yesus ialah Anak Allah. Orang yang mengikut Yesus akan menjadi anak-anak Allah. Yesus mengajar kita untuk berdoa “BAPA KAMI”. Kita boleh memanggil Allah sebagai Abba Bapa kerana Dia sudah mengangkat kita ke dalam keluarga-Nya. Dia mengasihi kita lebih daripada sesiapa pun. Bayangkan hal itu! Tuhan Pencipta yang Agung ialah Bapa kita!

Hidup mungkin susah tetapi kita tidak perlu takut kerana Abba Bapa kita sedang memperhatikan kita.

BERDOALAH:

- *Agar anda semakin hari semakin mengenal Tuhan dengan bercakap kepada-Nya dan membaca Alkitab.*
- *Agar bapa dan anak-anak di seluruh dunia akan mengasihi dan mengampuni satu sama lain.*

TINDAKAN:

- *Tulislah ketakutan dalam hidup anda. Pangkahkan ketakutan itu dan sebagai gantinya tulislah ‘Tuhan mengasihi saya.’ Lain kali, jika anda takut, mohonlah kasih daripada Tuhan untuk melenyapkan ketakutan.*



© Pagemaker Stockart



HARI 9: JULAI 30

Yahweh Syammah (Tuhan Ada Di Sana)

Yehezkiel 48:35 & Yesaya 12:6



CINA

Cina mempunyai penduduk yang paling ramai di dunia. Dua puluh lima tahun yang lalu, pemerintah meluluskan undang-undang yang membenarkan seorang anak sahaja bagi satu keluarga. Keluarga Cina menghargai anak lelaki lebih daripada anak perempuan. Akibatnya, ramai anak perempuan telah dibunuh atau dibuang, dan banyak anak tunggal sudah menjadi anak manja. Gereja berkembang dengan begitu pesat meskipun ada halangan-halangan daripada pemerintah. Berdoalah agar orang Cina akan menghargai setiap anak sebagai kurnia daripada Tuhan. Berdoalah agar orang Kristian Cina akan berdiri teguh ketika melalui semua kesukaran tersebut.

Perkara yang paling menarik mengenai kota Yerusalem yang baru (Syurga) adalah kehadiran Tuhan. Tuhan berada di sana, dan bergaul dengan kita seperti yang dilakukan-Nya dengan Adam dan Hawa di Taman Eden sebelum mereka berbuat dosa.

Adakah anda pernah mengalami kehadiran Tuhan? Bagaimana perasaan anda? Jika anda tidak pernah mengalami kehadiran-Nya, mohonlah Tuhan memberi anda pengalaman ini.

BERDOALAH:

- *Agar Tuhan sentiasa menyertai anda.*
- *Agar kehadiran Tuhan ada bersama dengan semua anak yatim, balu, ibu atau bapa tunggal, orang miskin, orang yang kekurangan, dan orang yang tiada tempat tinggal.*

TINDAKAN:

- *Jemputlah kawan baik anda (dengan kebenaran ibu bapa) untuk makan bersama anda.*



© 2000-2004 www.arttoday.com and its suppliers



HARI 10: JULAI 31

Aku Adalah AKU

Keluaran 3:11-15



PAPUA NEW GUINEA

Papua New Guinea adalah sebahagian daripada satu pulau di Lautan Pasifik. Ramai orang di sana beragama Kristian, tetapi banyak antara mereka tidak meninggalkan kepercayaan tahyul dan ilmu sihir. Kadang-kadang orang Kristian mencampurbaurkan ketakutan dan penyembahan kepada roh-roh dengan iman Kristian. Berdoalah agar Alkitab diajar kepada mereka supaya mereka tidak takut akan roh-roh. Berdoalah agar tanda-tanda dan mukjizat menyusul pengajaran Alkitab dan para pemimpin menggunakan kuasa dalam Yesus.

Dalam pembacaan hari ini, Tuhan mengingatkan Musa akan janji-janji-Nya kepada Abraham, Ishak, dan Yakub. Apabila Musa memohon kepada Tuhan akan caranya Dia diperkenalkan kepada orang Israel, Tuhan berfirman kepada Musa, 'Aku adalah AKU.'

Nama aneh, bukan? Tetapi Tuhan mempunyai alasan. Apabila kita berkata bahawa Tuhan ialah Tuhan, kita mengakui hakikat bahawa Tuhan tidak pernah berubah, tidak berubah, dan tidak akan pernah berubah (Ibrani 13.8). Dia sama, Kelmarin, Hari ini dan Selama-lamanya.

BERDOALAH

- *Bagi kanak-kanak Kristian untuk percaya bahawa Tuhan akan sentiasa mengasihi mereka dan tidak akan meninggalkan mereka.*
- *Agar Tuhan mengurniai guru-guru Sekolah Minggu/guru-guru sekolah anda dengan sukacita dan hikmat ketika mengajar anda.*

TINDAKAN:

- *Bawalah satu hadiah kecil bagi guru Sekolah Minggu/guru sekolah anda untuk berterima kasih kepadanya.*



© Pagemaker Stockart



HARI 11: OGOS 1

Yahweh Jireh (Tuhan Pembekal Kita)

Kejadian 22: 1-14



ANAK-ANAK CACAT

Anak-anak cacat adalah anak-anak yang susah menggunakan beberapa bahagian tubuh mereka. Oleh sebab itu, biasanya orang lain memperlakukan mereka dengan cara yang berbeza, mengejek mereka, atau membiarkan mereka sendirian. Tetapi kita tahu bahawa Tuhan mengasihi anak-anak yang cacat. Berdoalah agar mereka akan dikasihi dan dipelihara sama seperti anak-anak lain. Berdoalah agar anak-anak lain menunjukkan kasih kepada anak-anak cacat.

Jika kita mengerti bahawa Tuhan itulah Peribadi yang memberi kita segala sesuatu, kita tidak akan menolak apabila Dia mahu kita menyerahkan beberapa perkara. Sebilangan kita takut kehilangan bapa, ibu, kawan baik, binatang peliharaan, kedudukan dan populariti di dalam kelas. Apabila kita berpegang kuat pada apa yang kita ada, kita tidak dapat menerima berkat-berkat yang ingin diberikan Tuhan kepada kita.

Tetapi jika kita membuka tangan dan melepaskannya, Dia akan mencurahkan berkat-berkat kepada kita (Maleakhi 3.10).

BERDOALAH:

- *Mohonlah pengampunan Tuhan atas sikap kedekut kita.*
- *Marilah bersyukur kepada Tuhan bagi anggota keluarga, kawan sedarjah dan teman-teman kita.*
- *Agar kita mengongsikan pemberian Tuhan kepada kita dengan orang lain.*

TINDAKAN:

- *Pada hari ini, berilah persembahan yang lebih kepada Tuhan. Ingat, punyailah hati yang gembira.*




© 2000-2004 www.arttoday.com and its suppliers



HARI 12: OGOS 2

Yahweh Nissi (Tuhan Panji Kita)

Keluaran 17:14-15



PEKERJA KANAK-KANAK

Pekerja kanak-kanak adalah masalah yang biasa di banyak negara. Anak-anak bekerja 10 hingga 14 jam sehingga tiada masa untuk bersekolah atau bermain. Biasanya, tempat kerja mereka berbahaya dan tidak sihat. Anak-anak mendapat upah yang sangat murah. Berdoalah agar anak-anak dibenarkan pergi ke sekolah dan ada cara lain untuk menyelesaikan pekerjaan tersebut. Berdoalah agar pekerja anak-anak akan mendapatkan kebebasan dan sukacita dalam Tuhan. Berdoalah agar undang-undang yang melarang anak-anak bekerja dikuatkuasakan.

Pada hari ini, sasaran Iblis ialah anak-anak dan pemuda-pemudi. Dia tidak mahu mereka bebas. Polis mempunyai kuasa secara fizikal, tetapi Tuhan sudah memberi kita kuasa di dalam alam roh.

Kita mesti berlutut dan berdoa serta berseru kepada Yesus untuk menyingkirkan kejahatan.

BERDOALAH:

- *Agar Tuhan menjadi panji kemenangan dan keselamatan kita di mana saja kita pergi.*
- *Menentang semua perbuatan merogol, meliwat, dan membunuh di negara kita.*
- *Agar Tuhan mengubah hati orang yang merogol dan membunuh sehingga mereka benar-benar bertaubat.*
- *Bagi mangsa rogol agar mereka menemukan Tuhan sebagai satu-satunya sumber penghiburan dan pemulihan yang sejati.*

TINDAKAN:

- *Adakan perbincangan terbuka dengan ibu bapa/guru-guru mengenai penyebab dan akibat rogol. Mengapakah kebanyakan mangsa takut melaporkan jenayah itu? Bagaimanakah anda memperlakukan seseorang yang pernah dirogol? Apakah yang dilakukan oleh Yesus?*





HARI 13: OGOS 3

Yahweh Sidkenu (Tuhan Kebenaran Kita)

Yeremia 33:15-16



**ANAK-ANAK
DALAM KELUARGA
YANG BERANTAKAN**
Keluarga yang berantakan adalah keluarga yang hanya mempunyai ibu atau bapa, ibu atau bapa yang tidak berkahwin atau keluarga yang anggotanya tidak lagi saling mengasihi satu sama lain. Anak-anak dari keluarga yang berantakan memerlukan kasih dan sokongan kerana mungkin mereka akan menjadi amat sedih dan ingin mati saja. Berdoalah agar anak-anak ini mendapatkan kasih dalam keluarga Tuhan. Berdoalah bagi keluarga-keluarga supaya bersatu semula.

Perdana Menteri kita sudah memulakan misi yang besar untuk menghapuskan rasuah dalam kerajaan. Hal ini bererti dia hendak menghapuskan penipuan, pembohongan, dan perbuatan tidak jujur.

Setiap orang mungkin berfikir bahawa dia baik, tetapi Alkitab berkata bahawa tiada seorang pun yang benar di dunia ini (Roma 3.10) kecuali Tuhan Sidkenu. Hanya Tuhan yang dapat menolong kita menjadi suci, sebagaimana Dia suci.

BERDOALAH:

- *Mohonlah pengampunan daripada Tuhan bagi sikap sombong kita. Biarlah Yesus menunjukkan cara untuk berubah kepada kita (2 Korintus 5.21).*
- *Agar Tuhan mendedahkan serta menyingkirkan pemimpin-pemimpin yang tidak jujur dalam kerajaan.*
- *Agar para hakim dan peguam bersikap adil dan bertanggungjawab.*

TINDAKAN:

- *Bertemulah dengan seorang teman dan berdoalah bagi Perdana Menteri dan rakan sekerjanya.*





HARI 14: OGOS 4

Yahweh Syalom (Tuhan Kedamaian Kita)

Hakim-hakim 6:23-24



ANAK-ANAK PELARIAN
Setiap hari, 500 orang anak-anak menjadi pelarian. Hal ini berarti, mereka dipaksa meninggalkan rumah mereka dan mencari perlindungan di negara lain. Oleh sebab mereka sentiasa berpindah-pindah, anak-anak pelarian tidak dapat pergi ke sekolah dan tidak mempunyai cukup makanan. Ramai tidak mempunyai sijil kelahiran dan "tidak dipunyai" di mana-mana. Berdoalah agar mereka mengenal Tuhan sebagai Bapa mereka di syurga. Berdoalah agar mereka diterima di negara-negara yang boleh disebut sebagai tempat tinggal dan memberitahu orang lain mengenai Tuhan.

Adakah Anda inginkan dunia yang tiada peperangan dan penyakit? Dunia yang ada kedamaian dan sukacita? Tetapi hal ini rupanya mustahil berlaku. Bahkan dengan saudara-saudara sendiri pun kita berlawan kerana perkara kecil!


Hanya Tuhan, yang bernama Yahweh Syalom, boleh memberi kita kedamaian sejati. Tuhan mengutus Anak-Nya, Yesus Kristus, sebagai korban perdamaian untuk membawa kita semula kepada-Nya. Dengan kedamaian Tuhan di dalam hati kita, kita dapat mengasihi musuh dan melakukan kebaikan kepada orang yang berbuat jahat kepada kita.

BERDOALAH:

- *Agar kita berani memberitahu kawan-kawan kita bahawa kedamaian sejati datang daripada Yahweh Syalom.*
- *Agar bangsa yang berlainan saling menghormati.*

TINDAKAN:

- *Matius 5:9 berkata, "Berbahagialah orang yang membawa kedamaian antara manusia, Allah akan menyebut mereka anak-anak-Nya!" Jadilah pendamai di rumah, sekolah, dan gereja anda.*



© 2000-2004 www.arttoday.com and its suppliers



Adakah Tuhan bercakap dengan anda secara istimewa?
Ambil masa sekarang untuk menulis apa yang dikatakan-Nya:



HARI 15: 5 OGOS

Ikutlah Aku

Matius 16:24-28



ANAK-ANAK YANG KURANG PENDIDIKAN

Setiap orang perlu pergi ke sekolah, bukan? Kita perlu belajar tentang dunia, diri kita sendiri, dan hal-hal yang di sekeliling kita. Tetapi ada sebilangan anak-anak yang tidak dapat pergi ke sekolah walaupun mereka mahu. Ibu bapa mereka mungkin terlalu miskin, atau anak-anak perlu bekerja untuk menolong keluarga. Berdoalah agar semua anak-anak mempunyai peluang untuk pergi ke sekolah. Berdoalah agar gereja-gereja dan orang Kristian akan menolong keluarga miskin yang mempunyai anak-anak yang sedang bersekolah.

Kadang-kadang, mengikut Yesus akan membawa anda ke dalam kesukaran. Teman-teman mungkin mentertawakan anda. Menjadi anak Tuhan boleh menjadi agak susah. Tetapi memberitahu Tuhan untuk “pergi berambus” kerana anda tidak duduk di kerusi pemandu boleh merosakkan hidup anda.

Kita boleh memilih untuk “melekat” kepada Yesus dan terus mengikut Dia serta mentaati kehendak-Nya. Marilah memberi tempat kepada rancangan TUHAN dalam hidup kita! Yesus ialah “pemandu” hidup kita.

BERDOALAH:

- *Mintalah Tuhan menunjukkan rancangan-Nya untuk hidup anda.*
- *Mohon kekuatan untuk mengikut Tuhan dan kehendak-Nya setiap hari, apapun pendapat kawan-kawan anda mengenai anda.*

TINDAKAN:

- *Pada hari ini, susunlah meja anda di sekolah atau bersihkan bilik anda di rumah. Beritahulah Tuhan bahawa anda siap sedia untuk mentaati Dia.*





HARI 16: 6 OGOS

Itu Perintah!

Ratapan 3:27 & Titus 3:1



ANAK-ANAK JALANAN

Adakah anda tahu jumlah anak-anak yang tinggal di jalan raya di dunia? Jika anda mengira satu anak jalanan dalam satu saat, $3\frac{1}{2}$ tahun akan diambil untuk menghitung semuanya. Kebanyakan mereka tidak ada perlindungan kerana keluarga sudah tiada. Mereka bergantung kepada sesama kawan jalanan untuk mendapatkan pertolongan. Mereka membentuk kumpulan samseng untuk mendapat perlindungan dan sering kali terlibat dalam pergaduhan. Kerana pekerjaan sukar diperoleh, sering kali mereka mencuri untuk mengisi perut kosong. Berdoalah agar lebih banyak rumah kebajikan didirikan untuk menolong anak-anak jalanan, dan agar mereka mendapat keluarga Kristian yang mengasihi mereka.

Surat khabar kita mengandungi banyak berita buruk. Setiap hari, kita membaca tentang rogol, pembunuhan, dan pergaduhan. Rupanya keadaan ini semakin buruk. Memang menakutkan apabila kita memikirkan kejahatan yang dilakukan orang.

Tuhan sudah memberi perintah agar sikap saling mengasihi dan menghormati bermula di rumah.

BERDOALAH:

- *Agar Tuhan menolong anda untuk mengasihi dan mentaati ibubapa.*
- *Agar Tuhan menolong anda untuk mengasihi saudara lelaki dan perempuan.*
- *Agar Dia menyembuhkan luka-luka hati dalam keluarga anda.*

TINDAKAN:

- *Bacalah surat khabar hari ini dan petiklah berita yang “baik.” Kemudian, bersyukurlah kepada Tuhan atas “berita baik” dan berdoalah bagi “berita buruk.”*



© Pagemaker Stockart



HARI 17: 7 OGOS

Malaysia

1 Raja-Raja 3:10-12



© 2000-2004 www.arttoday.com and its suppliers

ANAK-ANAK DI DALAM PENJARA

Di beberapa negara, anak-anak dimasukkan ke dalam penjara kerana mereka terlibat dalam jenayah, pergaduhan, atau dadah.

Ada beberapa penjara yang mempunyai program baik untuk membantu anak-anak dalam penjara. Misalnya, mereka memberi tuisyen dan mengatur sukan di padang. Penjara lain pula sesak dan kotor.

Berdoalah agar gereja-gereja lebih giat melawat dan membantu anak-anak di dalam penjara, dan melalui lawatan ini, anak-anak akan mengetahui kemerdekaan yang sebenar dalam Yesus.

Negara kita sudah berusia 47 tahun, dan sudah menikmati banyak kejayaan seperti membina bangunan raksasa dan super stadium serta membawa masuk teknologi terkini. Bagaimanapun, ramai anak-anak didera, bahkan dibunuh. Apakah yang tidak kena?

Sekarang, sementara kerajaan memperbaiki kesalahan yang dibuat orang, anda boleh membantu dengan cara sendiri. Satu daripada yang paling baik adalah – berdoa. Setiap doa yang anda ungkapkan bagi kebaikan negara merupakan anak panah yang menyerang musuh.

BERDOALAH:

- *Bagi hikmat untuk para pemimpin gereja kita untuk mengerti rancangan Tuhan bagi negara.*
- *Bagi para pemimpin kita, terutamanya Perdana Menteri dan kerajaan, untuk memerintah dengan baik.*

TINDAKAN:

- *Carilah satu peta Malaysia dan berdoalah. Berdoalah agar gereja-gereja akan membantu menyelesaikan masalah dalam masyarakat kita.*



© 2000-2004 www.arttoday.com and its suppliers



HARI 18: 8 OGOS

Tiada Yang Kekal

Ibrani 12:25-29



ANAK-ANAK SENDIRIAN/ANAK-ANAK TERKURUNG
Ramai anak-anak terpaksa tinggal sendirian di rumah untuk tempoh yang lama kerana ibu bapa mereka bekerja. Anak-anak yang sendirian di rumah akan menjadi kesunyian dan muram. Mereka memerlukan kasih sayang dan persahabatan. Berdoalah agar anak-anak ini akan mendapat kawan-kawan yang baik dan hal-hal baik untuk dilakukan. Berdoalah agar ibu bapa akan memberi lebih banyak masa bersama dengan anak-anak dan bukan untuk pekerjaan mereka sahaja. Berdoalah agar anggota keluarga akan mengasihi Tuhan dan sesama.

Benda menarik, seperti Play Station terbaru atau telefon bimbit terkini; semuanya baik tetapi menjadi jahat jika benda itu menjauhkan kita daripada Tuhan.

Apabila orang Israel meninggalkan Mesir dan pergi ke tanah gurun, mereka mendapati hidup di gurun itu susah. Mereka selalu merungut walaupun Tuhan memelihara mereka. Akhirnya, semua meninggal kecuali Yosua, Kaleb, dan orang yang berumur 20 tahun ke bawah. Tuhan menyelamatkan generasi baru yang akan mengasihi dan melayani Dia. Mahukah anda mengasihi dan melayani Dia, walaupun hal itu bererti menyingkirkan benda-benda yang Anda sangat cintai, seperti permainan komputer dan patung-patung Barbie?

BERDOALAH:

- *Agar anak-anak, pemuda-pemudi dan semua orang dewasa akan menumpukan perhatian kepada Tuhan dan bukan kepada benda-benda.*
- *Agar mereka menyedari bahawa “Tiada yang kekal” kecuali Tuhan.*

TINDAKAN:

- *Kongsikan beberapa barang mainan/alat permainan/buku cerita dengan anak-anak yang miskin.*





HARI 19: 9 OGOS

Jangan Halau Mereka

Matius 19:13-15



© 2000-2004 www.art1today.com and its suppliers

ANAK YATIM

Anak yatim adalah anak-anak yang kehilangan seorang atau kedua-dua ibu bapa mereka, akibat perang atau penyakit. Anak-anak ini harus menjaga diri mereka sendiri. Mereka berasa sedih, kesunyian, dan takut. Berdoalah agar anak yatim piatu akan menemukan keluarga-keluarga Kristian yang mengasihi mereka dan menjaga mereka. Berdoalah agar mereka mengenal Tuhan sebagai Bapa dan Penghibur.

Ada sebilangan orang yang menyusahkan anak-anak, mempermainkan mereka atau memperlak kepercayaaan mereka yang sederhana dan murni.

Alkitab berkata di dalam Mazmur 127 bahawa anak-anak adalah anugerah daripada Tuhan. Yesus juga berkata di dalam Matius bahawa kerajaan Allah terdiri daripada orang seperti anda, anak-anak. Tuhan dapat melakukan hal-hal yang sangat cemerlang melalui anak-anak seperti anda.

BERDOALAH:

- *Bagi perlindungan anak-anak daripada budak-budak nakal di sekolah.*
- *Agar tiada seorang pun menghalang anda daripada menerima berkat-berkat Tuhan.*
- *Agar setiap anak di Malaysia akan mempunyai peluang untuk mengenal Yesus.*

TINDAKAN:

- *Hafal 1 Timotius 4.12. Kemudian perhatikan diri anda di cermin dan ucapkan ayat itu kepada diri anda sendiri dengan suara kuat. Jangan biarkan apa-apa yang dikatakan oleh sesiapa pun membuat anda kecewa. Mungkin mereka akan berfikir bahawa anda kecil dan tidak penting, tetapi di sisi Tuhan, anda sangat bernilai.*



© Pagemaker Stockart



HARI 20: 10 OGOS

Maksud Terakhir

Mazmur 33:12



© Pagemaker Stockart

ANAK-ANAK MENDERITA KERANA PERKAUMAN

Ada beberapa negara mempunyai masalah ini. Orang dari bangsa yang berbeza memandang rendah terhadap bangsa lain. Ramai kanak-kanak diperlakukan dengan buruk, dan tidak diberi hak yang sama rata. Misalnya, mereka tidak dibenarkan bermain atau pergi ke sekolah bersama. Akhirnya, ada kebencian, ketakutan dan andaian yang buruk. Berdoalah bagi kesatuan dan kasih di kalangan bangsa dan negara yang berlainan. Berdoalah agar gereja menjadi tempat orang dari semua bangsa merasa dikasihi dan diterima sebagai satu keluarga.

“Berbahagialah bangsa yang mengakui TUHAN sebagai Allahnya.”


Kerajaan mempunyai rancangan bagi negara kita yang disebut Wawasan 2020. Tuhan juga mempunyai rancangan bagi Malaysia dan marilah kita berdoa agar rancangan-Nya terlaksana. Tuhan membawa orang Melayu, Cina, India, dan bangsa lain ke Malaysia untuk suatu maksud: untuk membebaskan mereka daripada dosa.

BERDOALAH:

- *Agar anak-anak Kristian dan pemuda-pemudi Kristian menjadi saksi-saksi yang baik mengenai kasih Tuhan di Malaysia.*

TINDAKAN:

- *Ketahuiilah lebih banyak mengenai bangsa-bangsa lain, budaya, perayaan, dan amalan mereka.*



© Pagemaker Stockart



HARI 21: 11 OGOS

Lihatlah, Siapa Di Sini!

Yesaya 60:1-7



© 2000-2004 www.arttoday.com and its suppliers

ASKAR KANAK-KANAK

Ada banyak negara yang kanak-kanaknya diberi senapang dan diajar bagaimana membunuh orang. Memegang senapang mungkin kedengarannya menarik, tetapi anak-anak ini juga harus melalui banyak perkara yang dahsyat. Ramai di kalangan mereka kehilangan keluarga, kawan, rumah, kemurnian dan keselamatan. Berdoalah bagi askar kanak-kanak di beberapa tempat di dunia agar mereka mendapat kasih dan kedamaian dalam Yesus. Berdoalah agar anak-anak tidak diperalat untuk berperang melainkan digunakan oleh Tuhan.

Ada satu lagu Kristian yang berbunyi, “Aku mahu dalam terang seperti Engkau dalam terang. Aku mahu bersinar seperti bintang di Langit. Ya Tuhan, jadilah terangku dan Penyelamatku, kerana satu-satunya yang aku mahu adalah berada dalam Terang.”

Sikap kita seharusnya seperti demikian. Tuhan sudah memberi kita terang dan kemuliaan-Nya. Oleh itu, yang kita perlu buat adalah bangkit dan bersinar.

BERDOALAH:

- *Agar seluruh bangsa dan kota akan mendengar tentang kasih Tuhan.*
- *Agar Tuhan dimuliakan di seluruh dunia.*

TINDAKAN:

- *Nyalakan lilin di dalam bilik yang gelap dan berdoalah agar ramai orang Kristian bersinar bersama dan menjadikan Malaysia tanah yang terang. Sebagaimana lilin tetap menyala walaupun lilin meleleh, berdoalah agar terang Tuhan akan terus bersinar meskipun ada pelbagai masalah.*



© 2000-2004 www.arttoday.com and its suppliers



Adakah Tuhan bercakap dengan anda secara istimewa?
Ambil masa sekarang untuk menulis apa yang dikatakan-Nya:



HARI 22 –12 OGOS

Jangan Risau

Matius 6:25–34



PELACUR KANAK-KANAK

Ramai budak lelaki dan perempuan dijual dengan paksa untuk menjadi pelacur. Bukan sahaja mereka kehilangan kebebasan dan harga diri, tetapi mereka juga terdedah kepada penyakit seperti HIV/AIDS. Berdoalah agar lebih banyak orang Kristian yang akan menyelamatkan pelacur kanak-kanak dan memberitahu mereka darihal Yesus. Berdoalah agar anak-anak ini melihat Tuhan sebagai Peribadi satu-satunya yang boleh membebaskan, menyucikan, dan mengasihi mereka.

Kita risau terhadap markah peperiksaan (sama ada kita mendapat “A”) atau khuatir sama ada pakaian kita mengikut fesyen terkini atau kasut kita cukup “menarik.” Kita terlalu memperhatikan benda-benda yang tidak kekal.

Jangan risau dengan keadaan yang ketinggalan zaman. Jika kawan-kawan anda tidak mahu “berkawan” dengan anda lagi, kerana pakaian anda tidak cukup menarik, maka ertinya mereka bukanlah kawan-kawan yang sungguh-sungguh baik. Berkenaan peperiksaan anda pula, belajarlah bersungguh-sungguh, dan buatlah yang terbaik, dan serahkan keputusannya kepada Tuhan.

BERDOALAH:

- *Mohon pengampunan daripada Tuhan kerana terlalu risau dan tidak mempercayai-Nya.*
- *Bersyukurlah kepada Tuhan kerana memberi anda keperluan seharian seperti makanan dan pakaian dan juga tempatinggal.*
- *Agar kita tidak iri hati dengan orang lain yang mempunyai benda-benda yang kita tidak punyai.*
- *Agar Tuhan menolong anda memilih kawan-kawan yang baik, yang benar-benar mempedulikan anda.*
- *Agar anda menjadi kawan baik kepada kawan-kawan anda.*

TINDAKAN:

- *Ucapkan terima kasih kepada ibu bapa anda kerana memelihara Anda dan abang adik anda. Kirimlah kad-kad persahabatan kepada kawan-kawan baik anda.*



© Pagemaker Stockart



HARI 23: 13 OGOS

Sisa Makanan Pun Baik

Matius 15:21-28



ANAK-ANAK MENGAMBIL DADAH

Kadang-kadang anak-anak mengambil dadah kerana mereka bosan atau terpengaruh dengan kawan-kawan, “melarikan diri” daripada kesakitan dan tekanan. Apapun sebabnya, dadah itu haram dan sangat berbahaya pada tubuh anda. Setelah mengambilnya satu kali, sukar sekali untuk berhenti. Berdoalah agar anak-anak yang mengambil dadah akan mengerti bahaya dadah, dan tahu bahawa Yesus boleh menolong mereka. Berdoalah agar anak-anak di pusat pemulihan akan pulih daripada ketagihan dadah, dengan pertolongan Tuhan.

Kadang-kadang kelihatannya doa-doa kita tidak didengar, dan kita berasa seolah-olah Tuhan tidak mendengarkan kita.

Pembacaan hari ini adalah mengenai iman seorang perempuan Kanaan. Berulang kali, dia memohon kepada Yesus untuk menyembuhkan anak perempuannya. Dia tidak berputus asa. Seperti dia, kita juga tidak seharusnya mudah putus asa. Tuhan setia menjawab doa kita apabila kita berdoa menurut kehendak dan maksud-Nya.

BERDOALAH

- *Agar Tuhan menyertai keluarga anda dalam setiap keadaan.*

TINDAKAN:

- *Mainkan permainan “perang-tolak” dengan seorang adik, atau kawan. Anda harus membelakangi satu sama lain, berganding tangan, dan TOLAK/PUSH. Anda berdua harus mempunyai saiz badan yang sama. Penipuan atau kekerasan tidak dibenarkan. Orang yang dapat menolak sampai ke dinding, menang. Ingatlah selalu untuk TOLAK/PUSH (Pray Until Something Happens/Berdoa Terus Sehingga Ada Yang Berlaku).*





HARI 24: 14 OGOS

Persekutuan Kristian

Kisah Rasul 2:42-47



ANAK-ANAK YANG DIGUGUR

Anak-anak yang digugur adalah bayi yang dibunuh di dalam rahim, sebelum bayi dilahirkan. Setiap tahun, 46 juta bayi mati dengan cara ini di seluruh dunia. Hal ini amat menyedihkan kerana Tuhan mempunyai rancangan bagi setiap anak. Bersyukurlah kepada Tuhan atas ramai orang yang menyedari perkara ini dan cuba mengubah undang-undang agar pengguguran bayi diisytiharkan sebagai menyalahi undang-undang. Berdoalah agar orang akan menghargai kehidupan, bahkan kehidupan yang masih di dalam rahim.

Seperti yang anda baca dalam pembacaan hari ini mengenai orang Kristian yang menjual barang-barang mereka lalu mengongsikan wangnya dengan sesama, mungkin anda berfikir, “Untuk apa?” Sebenarnya, itulah cara mereka menunjukkan betapa besarnya kasih mereka kepada Yesus. Mereka sangat bersatu dan bersemangat dalam segala sesuatu yang dilakukan untuk Tuhan. Mereka hidup rukun dan saling mempedulikan sesama. Orang lain suka melihat perkara itu lalu bergabung dengan mereka.

Apabila kita mempunyai perhubungan yang saling mengasihi dengan orang Kristian lain, kita menyatakan kasih Tuhan kepada orang bukan Kristian. Kemudian, mereka mungkin ingin mengenal Tuhan kita.

BERDOALAH:

- Bagi para pemimpin Gereja, pastor dan penatua untuk saling mengasihi.
- Bagi orang Kristian untuk saling berkongsi dan memperhatikan satu sama lain.

TINDAKAN:

- Renungkan kesakitan yang Yesus harus alami dan pengorbanan-Nya agar kita mendapat kehidupan kekal. Bersyukurlah kepada-Nya atas semua yang telah dilakukan-Nya.



© Pagemaker Stockart



HARI 25: 15 OGOS

Percakapan Yang Berguna

Kisah Rasul 16:13-15



© Pagemaker Stockart

ANAK-ANAK MUBALIGH

Anak-anak mubaligh adalah anak-anak yang ibu bapa mereka adalah mubaligh di negara lain. Biasanya mereka sering berpindah-pindah, bertemu dengan berbagai jenis orang, dan mengalami hal-hal yang luarbiasa. Tetapi mereka juga boleh menjadi sunyi kerana keluarga mereka tidak tinggal di tempat yang sama untuk masa yang lama. Berdoalah agar anak-anak mubaligh cepat mendapat kawan-kawan yang baik supaya mereka tidak berasa sunyi. Berdoalah agar mereka menggunakan pengalaman mereka untuk menolong orang lain.

Apabila Anda berjumpa dengan kawan-kawan, mungkin ada bercakap tentang permainan, kad, komputer, rancangan TV, bukan? Sebaiknya, jangan lupa bercakap tentang hal-hal yang benar-benar penting.

Misalnya, kasih Allah dan pengorbanan Yesus serta kehidupan kekal. Apabila kita bercakap tentang permainan dan fesyen, marilah kita ingat untuk bercakap tentang Yesus.

BERDOALAH:

- *Mohonlah kepada Tuhan untuk memberi anda keberanian untuk bercakap mengenai kasih-Nya kepada kawan-kawan anda.*
- *Bagi kawan-kawan anda yang belum mengenal Yesus.*

TINDAKAN:

- *Ambillah benda-benda yang penting bagi anda. Kemudian tanyalah diri anda sendiri, "Adakah saya mengasihi Tuhan lebih daripada semua benda ini?" Jika anda secara jujur menjawab tidak, mohonlah kepada Tuhan untuk menolong anda supaya semakin hari semakin mengasihi Dia.*



© Pagemaker Stockart



HARI 26: 16 OGOS

Bercakap-cakap Dengan Ibu Bapa

Ulangan 6:4-9



© Pagemaker Stockart

ANAK-ANAK GEREJA

Anak-anak gereja adalah anak-anak yang membesar dalam keluarga Kristian dan persekitaran Kristian. Jika anda pergi ke Gereja, mungkin anda termasuk kategori ini. Anak-anak gereja biasanya tahu agak banyak mengenai Tuhan dan Firman-Nya. Tetapi mereka juga lebih cenderung menyimpang daripada Tuhan. Berdoalah agar anak-anak gereja akan mengalami Tuhan dalam hidup mereka dan mengenal bahawa Dia sungguh-sungguh ada. Berdoalah agar mereka akan menjadi terang Tuhan kepada kawan-kawan mereka di sekolah.

Alkitab bercakap tentang caranya ibu bapa mengajar anak-anak mereka tentang Tuhan, dan caranya anak-anak sepatutnya mendengarkan ibu bapa mereka. Kita, anak-anak, seharusnya mendengarkan ibu bapa kita dan memperhatikan arahan mereka.

Mungkin kita berfikir bahawa “Ibu bapa saya tidak baik,” atau “ibu bapa saya terlalu tegas.” Mungkin kita belum memberitahu mereka semua hal kita dan apa yang berlaku di sekolah.

BERDOALAH:

- *Agar Tuhan menolong kita untuk berkongsi secara terbuka dengan ibu bapa kita.*
- *Bagi ibu bapa kita untuk berkongsi secara terbuka dengan kita.*

TINDAKAN:

- *Beritahulah ibu bapa anda apa yang berlaku di sekolah hari ini.*



© Pagemaker Stockart



HARI 27: 17 OGOS

Rakyat Yang Setia

Titus 3:1-2



PERLIS

Perlis adalah negeri yang terkecil di dalam negara kita. Di sana juga dadah, senapang, dan bahan-bahan pornografik diseludup masuk di sempadan. Penjenayah membayar wang kepada polis supaya tidak menangkap mereka. Berdoalah agar hal ini berhenti dan agar orang akan berkata "tidak" kepada dadah. Berdoalah agar polis tidak tamak. Berdoalah agar gereja-gereja akan mengajar orang mengenai hukum Tuhan dan apa yang difirmankan-Nya.

Mungkin anda berpendapat bahawa kerajaan adalah urusan orang dewasa, dan anak-anak tiada kena-mengena dengan hal ini.

Anak-anak juga, mempunyai tanggungjawab terhadap negara, tempat di mana mereka diletakkan Tuhan. Tuhan menyuruh kita untuk menghormati kerajaan dan mematuhi undang-undang, agar negara menjadi tempat yang baik untuk didiami.

BERDOALAH:

- Bersyukurlah kepada Tuhan atas Perdana Menteri yang baru dan para menteri beliau.
- Bagi hikmat dan kejujuran untuk kerajaan semasa memerintah negara ini.

TINDAKAN:

- Perhatikan balai polis, balai bomba dan balai-balai serta pejabat-pejabat kerajaan yang lain di kawasan anda. Berdoalah bagi para pekerja di sana agar mereka berkhidmat kepada rakyat dengan baik.



© 2000-2004 www.arttoday.com and its suppliers



HARI 28: 18 OGOS

Lima Roti dan Dua Ikan

Matius 14:15-21



KEDAH

Berdoalah agar gereja-gereja akan menjangkau orang miskin dan yang kekurangan. Berdoalah agar lebih banyak gereja yang dibina di setiap pekan dan kampung.

Kita semua cukup makan. Kadang-kadang, kita terlalu memilih makanan dan bahkan membuang makanan yang baik. Bagaimana pula dengan anak-anak yang miskin dan lapar di dunia? Lebih buruk lagi, mereka tidak mengenal Yesus.

Alkitab bercakap tentang mukjizat memberi makan kepada lebih 5000 orang dengan lima roti dan dua ikan. Mukjizat ini bermula dengan seorang budak lelaki yang rela memberi. Seperti dia, kita juga dapat memberi dan berkongsi dengan murah hati kepada orang yang ada keperluan, agar mereka juga boleh datang dan mengenal Yesus. Kita juga akan mengalami sukacita dalam memberi.

BERDOALAH:

- *Bersyukurlah kepada Tuhan atas makanan dan semua yang dibekalkan-Nya.*
- *Bagi anak-anak yang miskin dan lapar.*
- *Agar anda rela mengongsi makanan/benda-benda anda bila-bila ada peluang.*

TINDAKAN:

- *Lain kali, apabila anda melihat seorang pengemis, mahukah anda memberi sesuatu kepadanya? Pemberian tidak perlu banyak.*





Adakah Tuhan bercakap dengan anda secara istimewa?
Ambil masa sekarang untuk menulis apa yang dikatakan-Nya:



HARI 29: 19 OGOS

Jalan Tuhan, Bukan Jalan Kita

Efesus 5:1



PENANG

Pulau ini umpama hidangan rojak yang mempunyai ramai pelancong dan orang dari berbagai-bagai bangsa. Ada orang Cina, Melayu, Indonesia dan setiap bangsa dari negara-negara jiran kita. Berdoalah agar gereja-gereja akan mengambil peluang ini untuk mengongsikan Injil dengan kaum-kaum tersebut.

Yesus mati di kayu salib untuk menanggung dosa kita dan menghapuskan semua rekod jahat kita. Dia mengampunkan semua kesalahan kita.

Apabila seseorang melakukan kesalahan atau melukai hati kita, kita perlu mengampuni mereka sebagaimana Yesus mengampuni kita. Perkara ini bukan mudah, tetapi kita boleh melakukannya dengan pertolongan Tuhan.

BERDOALAH:

- *Mohonlah kepada Tuhan untuk memberi kita kekuatan untuk mengampuni.*

TINDAKAN:

- *Bacalah 1 Korintus 13.4–7 dan kongsikan dengan ibu bapa/guru/kawan ayat-ayat yang amat bermakna bagi anda.*





HARI 30: 20 OGOS

Tujuh Puluh Kali Tujuh

Matius 18:21-22



PERAK

Anak-anak dan pemuda-pemudi Kristian di sini memerlukan doa dan dorongan agar iman mereka menjadi lebih kuat.

Berdoalah agar para pelajar benar-benar mencari Tuhan dan agar Tuhan mencurahkan Roh-Nya atas mereka.

Berdoalah bagi para pemimpin pemuda-pemudi agar mereka menjadi pemimpin yang baik.

Berapakah 70 kali 7? Ya, 490! Banyak! Yesus memberitahu kita bahawa itulah jumlahnya kita patut mengampuni ibu, bapa, abang, kakak, kawan . . . dan bahkan musuh kita yang paling jahat.

BERDOALAH:

- *Agar rumah kita menjadi tempat pengampunan.*
- *Agar kita berhenti bersungut mengenai sekolah, rumah, dsb., dan mula berkafir tentang Tuhan atas kasih-Nya dan kesabaran-Nya terhadap kita.*

TINDAKAN:

- *Tulislah sekeping nota kepada seorang anggota keluarga yang telah melakukan hati anda, dan beritahulah dia bahawa anda mengasihi dan mengampuninya.*





HARI 31: 21 OGOS

Jika Umat-Ku...

2 Tawarikh 7:14-15



SELANGOR

Bersyukurlah kepada Tuhan atas kumpulan Kristian yang menolong orang miskin, orang sakit dan orang tua. Berdoalah agar gereja-gereja akan bekerjasama dengan kumpulan kebajikan bukan Kristian untuk menjangkau masyarakat bagi Yesus.

Alkitab berkata bahawa kita perlu merendahkan diri dan berdoa. Kemudian Tuhan akan mengampunkan dosa kita serta memberkati negara kita. Oleh itu, marilah berlutut dan berdoa bagi Malaysia.

BERDOALAH:

- *Agar Tuhan menunjukkan dosa kita, agar kita dapat bertaubat daripadanya.*
- *Untuk anak-anak yang akan menyembah Tuhan dan mengasihi-Nya.*

TINDAKAN:

- *Mahukah anda belajar menjadi rendah hati? Mulailah melayani anggota keluarga anda. Misalnya: anda boleh memberi adik/abang/kakak anda segelas air jika mereka memintanya; anda boleh menolong emak mengemaskan meja selepas makan petang; anda boleh mengakui kesalahan dan meminta maaf.*



© 2000-2004 www.arttoday.com and its suppliers



HARI 32: 22 OGOS

Tunjukkan Belas Kasihan

Matius 18:23-35



WILAYAH PERSEKUTUAN

Berdoalah agar para pemimpin mempunyai hikmat. Berdoalah bagi Kementerian Pendidikan untuk memperhatikan pendidikan dan kebajikan para pelajar. Berdoalah agar Tuhan menolong polis untuk melakukan tugas mereka.

Inilah cerita mengenai pengampunan. Raja mengampuni hambanya yang berhutang seratus ribu dollar dengan dia. Tetapi hambanya tidak mempunyai hati yang mengampuni. Kawannya berhutang sepuluh dollar dengannya, dan apabila dia tidak dapat membayar, hamba itu memasukkan dia di dalam penjara.

Jika Yesus dapat membatalkan semua rekod dan hutang jahat kita, mengapa pula kita tidak dapat mengampuni orang yang berhutang sedikit dengan kita?

BERDOALAH:

- *Agar Tuhan memberi anda hati yang ada belas kasihan, dan yang mudah mengampuni.*
- *Agar Tuhan memberkati pengusaha kantin sekolah, pemilik kedai buku dan para pekebun, dengan kesihatan yang baik dan kewangan yang cukup.*

TINDAKAN:

- *Adakah sesiapa yang anda belum ampuni? Mohonlah kepada Tuhan untuk memberi anda kekuatan untuk mengampuni orang. Kembalikan sesuatu yang telah anda pinjam atau ambil tanpa kebenaran.*





HARI 33: 23 OGOS

Jagalah Kemurnian Hati Anda

Roma 12:1-2



NEGERI SEMBILAN

Gereja-gereja di sini tidak mempunyai cukup pemimpin kerana ramai orang berpindah ke bandar-bandar besar seperti Kuala Lumpur, untuk mencari pekerjaan. Berdoalah agar Tuhan akan membangkitkan pemimpin baru dan agar orang Kristian di sini akan terus mengongsikan kasih Yesus.


Kita mesti berhati-hati dengan apa yang kita tonton di televisyen dan di Internet, atau apa yang kita lihat di majalah dan buku komik. Gambar-gambar yang jahat akan tetap ada di dalam minda kita untuk masa yang lama dan mempengaruhi kelakuan kita. Misalnya, ramai anak-anak takut kegelapan kerana beberapa tayangan TV yang ditonton mereka.

BERDOALAH:

- Supaya ada hikmat untuk memilih tayangan TV, filem, buku, dan hal lain.
- Agar kita rela meminta bimbingan dan bantuan daripada ibu bapa kita.
- Agar Tuhan sentiasa melindungi kita.

TINDAKAN:

- Bacalah Roma 12 dengan suara kuat agar anda memiliki Firman Tuhan di dalam hati dan minda anda.





HARI 34: 24 OGOS

Bersetuju Dengan Tuhan

1 Yohanes 1: 5–10



MELAKA

Melaka adalah permata sejarah negara kita. Di sanalah Injil Yesus pertama-tama diberitakan di Malaysia. Berdoalah agar terang Tuhan bersinar kepada penduduk Melaka. Berdoalah agar gereja-gereja akan bekerjasama untuk menjangkau kampung yang belum mendengar pemberitaan tentang Yesus.

Tuhan itu terang dan tiada sedikitpun kegelapan di dalam Dia. Apabila kita menyambut Yesus menjadi Tuhan dan Penyelamat kita, kita disebut anak-anak terang. Sebagai anak-anak terang, kata-kata dan perbuatan kita seharusnya menyenangkan hati Tuhan. Kita sepatutnya berkelakuan baik agar kawan-kawan kita tahu bahawa Yesus itu Tuhan yang baik.

BERDOALAH:

- *Mohonlah kepada Tuhan untuk menolong kita dalam perbuatan dan kata-kata kita.*
- *Bagi kerajaan, agar para pemimpin kita mengambil keputusan yang baik dalam segala perkara.*

TINDAKAN:

- *Apabila kita tidak memakai pakaian seragam sekolah, pakailah pakaian yang cerah untuk melambangkan cahaya Tuhan yang bersinar melalui anda. Ingatlah untuk bersinar bagi Tuhan di mana sahaja anda berada.*





HARI 35: 19 OGOS

Tunjukkan Kemurahan Hati

Ulangan 15:12-18; Yesaya 60:10-12



JOHOR

Berdoalah agar orang daripada berbagai-bagai bangsa dapat hidup rukun. Berdoalah agar ada lebih banyak pekerjaan. Berdoalah bagi gereja-gereja untuk menolong orang di kawasan kampung.

Bayangkan perasaannya meninggalkan semua kawan dan keluarga kita lalu pergi ke negara lain untuk bekerja. Upahnya rendah, orang memandang rendah pada kita, dan kita harus bekerja keras selalu.


Di negara kita, terdapat ramai pekerja asing yang bekerja sebagai pembantu rumah, buruh pembinaan atau pekerja kilang. Kadang-kadang, mereka ditipu atau dipukul. Mungkin mereka pernah menimbulkan masalah, tetapi mereka juga telah membina banyak bangunan dan melakukan kerja yang kita tidak mahu lakukan. Marilah kita berterima kasih, dan menunjukkan kemurahan hati kepada mereka.


BERDOALAH:

- *Bagi majikan supaya bermurah hati kepada pekerja asing.*
- *Bagi orang Kristian untuk mengongsikan Injil kepada mereka.*
- *Bagi orang asing untuk berterima kasih atas pekerjaan yang mereka ada di sini, dan supaya tidak menyebabkan apa-apa masalah.*

TINDAKAN:

- *Pelajarilah kata untuk "TUHAN" dalam bahasa-bahasa ini dan pakailah kata itu dalam doa anda. Bahasa Melayu/Indonesia; Mandarin; Thai; Vietnam; Filipina; Burma; Bangladesh; Tamil*





© Pagemaker Stockart

Adakah Tuhan bercakap dengan anda secara istimewa?
Ambil masa sekarang untuk menulis apa yang dikatakan-Nya:



HARI 36: 26 OGOS

Percayalah kepada Tuhan (Buat Saja!)

1 Yohanes 5:1-5



PAHANG

Berdoalah agar lebih banyak gereja dibina di kampung-kampung Orang Asli. Berdoa bagi pelatih dan jurulatih dalam Khidmat Negara. Berdoa untuk perlindungan mereka.

Kita diberkati kerana kita percaya kepada Yesus yang maha kuasa, maha perkasa, maha tahu, dan maha melihat. Dialah Sahabat kita yang tidak akan pernah meninggalkan kita atau membiar kita terlantar dalam apapun yang kita lakukan dan ke mana saja kita pergi.

BERDOALAH:

- *Agar kita mengenal Yesus dengan lebih dalam setiap hari.*
- *Agar kita disiplin membaca Alkitab setiap hari.*

TINDAKAN:

- *Mahukah anda membantu seorang kawan yang mungkin ada masalah dalam perjalanan mereka bersama dengan Yesus atau dalam pelajaran mereka?*



© Pagemaker Stockart



HARI 37: 27 OGOS

Janji Adalah Janji

Markus 7:6-7



TERENGGANU
Terengganu adalah negeri yang menarik ramai pelancong. Kebanyakan orang di sini beragama Islam. Negeri ini sekarang mempunyai pemimpin baru yang diundi dalam pilihan raya baru-baru ini. Berdoalah agar para pemimpin akan memerintah dengan baik dan menjaga rakyat dengan baik. Berdoalah agar anak-anak akan mengenal Yesus.

Adakah anda ingat akan janji-janji anda kepada Tuhan, ibu bapa anda, adik/abang/kakak anda, teman-teman anda? Mungkin anda telah berjanji kepada ibu bapa untuk belajar dengan tekun, membantu di rumah, menjaga adik, berhenti bergaduh...


Janji-janji mesti ditunaikan. Apabila kita membuat janji, kita mesti bersedia untuk menunaikannya.

BERDOALAH:

- *Agar kita menunaikan janji walaupun sukar untuk melakukannya.*
- *Agar kasih dan penyembahan anda kepada Tuhan itu sungguh-sungguh.*

TINDAKAN:

- *Tunaikan janji anda pada hari ini.*





HARI 38: 28 OGOS

Kejujuran

1 Petrus 2:11-17



KELANTAN

Berdoalah bagi semua pastor dan keluarga mereka. Berdoalah bagi kesatuan di kalangan gereja-gereja. Berdoalah agar lebih ramai orang Kristian datang berkumpul dan berdoa bagi negeri ini.

Di dalam gereja, ada orang dari berbagai-bagai latar belakang, yang menuturkan bahasa yang berlainan, kelihatan berbeza, dan bahkan cara bercakap pun lain. Tetapi kita semua anggota keluarga yang sama – keluarga Kristus.

Jika anggota keluarga tidak mengasihi satu sama lain dan bergaduh dengan sesama, semua orang akan menderita, tetapi anggota yang paling sedih ialah Yesus.

BERDOALAH:

- *Agar orang Kristian di gereja anda saling mengasihi.*
- *Agar pemimpin gereja anda jujur terhadap satu sama lain.*

TINDAKAN:

- *Berdoalah bagi kawan-kawan anda di Sekolah Minggu, terutamanya orang yang tidak selalu menghadiri kelas. Lain kali, apabila anda berjumpa dengan mereka, tanyalah khabar mereka.*



© Pagemaker Stockart



HARI 39: 29 OGOS

Kalahkan Kejahatan Dengan Kebaikan

Roma 12:14-21



SARAWAK

Berdoalah agar Tuhan membawa mubaligh-mubaligh ke tempat-tempat yang belum ada Alkitab dan agar setiap suku akan mempunyai Alkitab dalam bahasa mereka sendiri. Berdoalah bagi kedamaian dan kebahagiaan di Sarawak, dan agar orang Kristian disatukan tanpa melihat suku atau latar belakang. Berdoalah bagi lebih ramai pekerja gereja di Sarawak.

Sebagai orang Kristian, kita harus mengasihi satu sama lain walaupun kita tidak berasa ingin mengasihi mereka. Kadang-kadang, orang Kristian pun sombong dan memandang rendah kepada orang lain.

Tuhan mahu kita hidup rukun dengan sesama, dan tidak menyendiri. Berkawanlah dengan orang yang dianggap 'tidak penting.'

BERDOALAH:

- *Agar kita dapat menjadi kawan baik dengan orang yang tidak begitu mesra.*
- *Agar Tuhan menolong kita untuk menunjukkan kebaikan hati kepada orang yang telah melukakan hati kita.*

TINDAKAN:

- *Pada hari ini, jangan ucapkan satupun perkataan jahat mengenai sesiapa atau apa-apa. Ucapkan kata-kata yang baik sahaja, yang lemah lembut dan mendorong. Carilah jalan untuk menolong orang lain.*



© 2000-2004 www.arttoday.com and its suppliers



HARI 40: 30 OGOS

Tuhan Yang Berkuasa di dalam Kita

1 Yohanes 4:4-6



SABAH

Bersyukurlah kepada Tuhan atas ramai orang yang datang kepada Kristus di Sabah.

Berdoalah agar Sabah akan menjadi tempat yang lebih selamat. Berdoalah bagi polis supaya berani dan bijak semasa mereka menjalankan tugas untuk menangkap penjenayah, lanun, dan pengganas. Berdoalah agar gereja-gereja di sini tidak berhenti memberitakan kasih Tuhan.

Adakah kita percaya bahawa Tuhan yang tinggal di dalam kita itu lebih besar dan lebih kuat daripada apapun di dunia? Dia menghibur kita apabila kita sedih, menolong kita menyelesaikan masalah, memberitahu kita ketika kita melakukan sesuatu yang salah, membimbing kita apabila kita dalam kesusahan.

Tuhan selalu ada untuk menolong kita.

BERDOALAH:

- *Agar kita mengalami kuasa Tuhan dalam hidup.*
- *Agar kita rela menolong orang lain yang sedih dan bermasalah.*

TINDAKAN:

- *Mohon Tuhan untuk menunjukkan seseorang kepada anda, orang yang berasa sedih atau gelisah. Pergilah berjumpa dengan orang tersebut dan jadilah kawannya.*



© Pagemaker Stockart



HARI MERDEKA: 31 OGOS

Rumah Doa Bagi Malaysia

Yesaya 56:7

Inilah hari terakhir 40-Hari Puasa dan Doa. Kita mesti terus berdoa bagi bangsa kita, kerajaan dan para pemimpin kita. Kita mesti terus mengongsikan kasih Yesus. Nantikan dan harapkan pekerjaan Tuhan yang hebat dalam negara kita!

BERDOALAH:


- *Pujilah dan bersyukurlah kepada Tuhan atas kasih dan kesetiaan-Nya.*

TINDAKAN:

- *Buatlah penanda buku untuk mengingatkan anda untuk mendoakan Malaysia. Setiap malam, pada masa anda masuk tidur, berdoalah bagi negara kita.*



© 2000-2004 www.arttoday.com and its suppliers



Adakah Tuhan bercakap dengan anda secara istimewa?
Ambil masa sekarang untuk menulis apa yang dikatakan-Nya:

Kesaksian Anda Berkuasa, Oleh itu Sila Kembalikan Borang Ini Kepada Kami



Terima kasih kerana mengambil bahagian dalam Terangi Bangsa Kita 2004. Kami amat menghargai jawapan balas anda sebagai rakan dalam gerakan doa bagi bangsa kita. Sila berikan butir-butir kesaksian yang tepat atau laporan agar kita dapat mendorong orang lain.

Mahukah anda ditambahkan pada senarai penerima surat kami? ☐ YA ☐ TIDAK

Gelaran: _____

Nama Penuh: _____

Alamat: _____

_____ Poskod: _____

Tel/Faks: _____

E-mel: _____

Nama gereja atau kelompok doa:


Nama orang yang turut terlibat dalam kelompok anda (jika berkenaan):

Adakah kesaksian yang jelas atau mendorong yang anda sudah dengar atau alami selama 40 hari ini?

Doa-doa yang dijawab semasa atau selepas 40 hari:

Mahukah anda mendapatkan maklumat atau bantuan mengenai:

- Berdoa 24-Jam bagi Malaysia ☐ YA ☐ O
- Doa syafaat untuk anak-anak ☐ O



Sila kembalikan kepada:
Komisi Doa NECF Malaysia
Alamat: 32, Jalan SS 2/103,
Petaling Jaya 47300
E-mel: prayer@necf.org.my atau
Faks: 03-77291139